

***Qabd* dan Hukum Penarikan Balik Hibah**

**NOOR LIZZA BINTI MOHAMED SAID
MOHD RIDZUAN BIN AWANG
AMIR HUSIN BIN MOHD NOR**

Abstrak

Satu fenomena yang berlaku bagi segelintir masyarakat Muslim pada hari ini yang menghibahkan harta mereka kepada orang yang dikasihi namun mensyaratkan harta yang dihibah tidak dipindah milik kepada penerima hibah bagi memudahkan mereka membatalkan pemberian hibah tersebut jika perlu. Justeru, ia menjadi pencetus kepada kajian ini yang objektifnya adalah untuk mengkaji pandangan fuqaha dan hujah-hujah mereka berkaitan dengan keperluan qabd dalam akad hibah, kedudukan akad hibah apabila berlaku kematian salah seorang daripada yang berakad sebelum qabd, hukum penarikan balik hibah sebelum dan selepas qabd dan hukum penarikan balik hibah bapa kepada anaknya. Kajian perpustakaan digunakan dengan mengumpul dan mengkaji dokumen-dokumen yang berkaitan yang terdiri daripada buku dan jurnal. Daripada hasil kajian didapati akad hibah sempurna dan berkuat kuasa dengan sempurnanya qabd oleh penerima hibah. Pemberi hibah berhak menarik balik hibahnya sekiranya tidak berlaku qabd kecuali pemberian bapa kepada anak. Oleh itu, qabd merupakan syarat yang sempurna dan berkuat kuasanya hibah dan ia menentukan hak penarikan balik hibah oleh pemberi hibah.

Abstract

It becomes a phenomenon among the Muslim society nowadays gives their wealth and property to the beloved ones but at the same time putting a condition that the ownership of property is not transferred outrightly as a measure to revoke it if needed. This becomes an impetus to carry out the study in which the objective is to analyze Muslim scholars point of view and their reasons concerning the need of qabd (taking possession) in gift contract, the position of gift contract when one of the party dies before qabd, the rule of gift retraction before and after qabd as well as the rule on withdraw of gift from father to child. The study uses library research whereby all relevant documents and data including book and jurnal are gathered and analyzed. The findings of the study show that gift contract is not completed and enforceable without exercising qabd on part of donee. The donor eligibles to withdraw the gift if the qabd is not exercised except the gift from father to child. Thus, qabd is classified as a completed condition and enforced of gift contract as well as to determine the right to withdraw the gift from the donor.

Pendahuluan

Hibah merupakan salah satu instrumen perancangan harta umat Islam yang digalakkan. Ia disyariatkan melalui al-Quran, al-Sunnah dan Ijmak ulama. Pensyariatannya bukan untuk membelakangi sistem faraid tetapi sebagai pelengkap kepada sistem pengagihan harta dalam Islam. Hibah merupakan pemberian milik harta yang berkuat kuasa ketika hayat pemberi hibah berbanding dengan pembahagian secara faraid yang dilaksanakan selepas kematian pewaris.

Kesedaran umat Islam pada hari ini untuk mengagihkan harta mereka ketika hidup kepada orang yang dikasihi tanpa menunggu pengagihan selepas kematian melalui sistem faraid semakin tinggi. Namun terdapat sebahagian daripada mereka yang ragu-ragu untuk menyerahkan atau memindah milik harta yang dihibahkan kepada penerima hibah secara terus ketika hidup kerana dikhuatiri dirinya akan

dipinggirkan oleh penerima setelah diserahkan keseluruhan hartanya. Ada antara mereka juga yang khawatir harta mereka disalah gunakan dan tidak boleh ditarik balik kerana ia telah dimiliki oleh penerima hibah. Senario-senario tersebut membuatkan mereka yang ingin menghibahkan harta mensyaratkan harta yang dihibah tidak dipindah milik kepada penerima hibah agar tidak berlaku perkara-perkara yang mereka khawatiri dan memudahkan mereka membatalkan pemberian tersebut jika perlu.

Oleh itu, artikel ini akan mengkaji pandangan fuqaha berkaitan hukum dan kedudukan qabd dalam akad hibah berdasarkan hujah-hujah mereka seterusnya melihat hubung kaitnya dengan hukum penarikan balik hibah.

Keperluan qabd dalam hibah

Qabd menurut Ibn Manzur bermaksud mengambil sesuatu dengan tangan secara langsung atau menggenggam sesuatu.¹ Dari segi istilah pula bermaksud penerimaan yang membenarkan berurusan atau bertasarraf dengan harta yang diterima.² Al-Kasani pula mentakrifkan *qabd* sebagai keupayaan untuk berurusan dengan harta yang diterima.³

Para fuqaha berselisih pendapat tentang keperluan qabd dalam akad hibah sama ada ia merupakan syarat dalam akad ataupun sebaliknya. Perselisihan tersebut dibahagikan kepada empat golongan iaitu:

- a. Imam al-Thauri, Abu Hanifah, al-Shafi'i dan satu riwayat daripada Imam Ahmad berpendapat, *qabd* ialah syarat *luzum*⁴ atau syarat sah hibah.⁵ Akad hibah tidak berkuat kuasa hanya dengan *ijab* dan *qabul* sahaja tanpa *qabd*⁶. Oleh itu, pemberi hibah boleh menarik balik hibahnya pada bila-bila masa selagi ia masih berada dalam pemilikannya atau tidak berlaku penyerahan harta yang dihibahkan kepada penerima.
- b. Imam Ahmad Ibn Hanbal dalam salah satu daripada riwayatnya menjadikan *qabd* sebagai syarat sah hibah bagi sesuatu yang diukur atau ditimbang sahaja⁷
- c. Imam Malik berpendapat, *qabd* ialah syarat sempurna hibah bukan syarat sah atau *luzum* kerana hibah adalah sah hanya dengan akad iaitu dengan *ijab* dan *qabul*⁸

- d. Imam Ahmad, Abu Thaur dan mazhab Zahiri berpendapat, qabd bukan merupakan salah satu daripada syarat hibah. Ia bukan syarat sah mahupun syarat sempurna hibah bahkan hibah sah hanya dengan akad.⁹

Ulama yang tidak mensyaratkan *qabd* dalam hibah berhujah dengan menyamakan akad hibah dengan akad jual beli kerana pada asalnya *qabd* tidak disyaratkan sebagai syarat sah sesuatu akad sehingga terdapat dalil yang menjadikannya sebagai syarat.¹⁰ Bahkan sepatutnya akad jual beli lebih memerlukan kepada syarat *qabd* bagi penetapan milik daripada kedua-dua belah pihak berbanding dengan akad hibah daripada satu pihak sahaja.¹¹ Mereka juga berhujah dengan umumnya hadis Rasulullah SAW:

حَدَّثَنَا مُسْلِمُ بْنُ أَبِرَاهِيمَ حَدَّثَنَا وَهَيْبٌ حَدَّثَنَا ابْنُ طَاوُسٍ عَنْ أَبِيهِ عَنْ ابْنِ عَبَّاسٍ رَضِيَ اللَّهُ عَنْهُ قَالَ: قَالَ النَّبِيُّ صَلَّى اللَّهُ عَلَيْهِ وَسَلَّمَ قَالَ: الْعَائِدُ فِي هَبَّتِهِ كَالْكَلْبِ يَقِيءُ ثُمَّ يَعُودُ فِي قَيْئِهِ

Maksud:

Daripada Muslim bin Ibrahim diriwayatkan wahib diceritakan dari Ibn Towus daripada bapanya daripada Ibn Abas RA katanya Rasulullah SAW bersabda: Orang yang menarik balik hibahnya seperti anjing yang muntah kemudian memakan muntahnya kembali.¹²

Dengan hanya berlakunya akad, pemberi hibah berhak menguatkuasakan akad tersebut sebagaimana akad wakaf dan pembebasan hamba¹³ kerana kedua-dua akad ini berkuat kuasa hanya dengan berlakunya akad tanpa perlu kepada *qabd*.¹⁴

Manakala ulama yang mensyaratkan *qabd* sebagai syarat berkuat kuasanya hibah berhujah dengan dalil-dalil berikut:

- i. Saidatina 'Aisyah meriwayatkan:

عَنْ عَائِشَةَ رَضِيَ اللَّهُ عَنْهَا زَوْجِ النَّبِيِّ صَلَّى اللَّهُ عَلَيْهِ وَسَلَّمَ أَنَّهَا قَالَتْ: إِنَّ أَبَا بَكْرٍ الصِّدِّيقِ رَضِيَ اللَّهُ عَنْهُ نَحَلَهَا جِدَادًا عِشْرِينَ وَسَقًا مِنْ مَالٍ بِالْغَابَةِ

فَلَمَّا حَضَرَتْهُ الْوَفَاةُ قَالَ وَاللَّهِ يَا بِنِيَّةُ مَا مِنْ النَّاسِ أَحَدٌ أَحَبَّ إِلَيَّ غَنَى بَعْدِي مِنْكَ وَلَا أَعَزَّ عَلَيَّ فَقْرًا بَعْدِي مِنْكَ وَإِنِّي كُنْتُ نَحَلْتُكَ مِنْ مَالِي جَدَادٌ عَشْرِينَ وَسَقًّا فَلَوْ كُنْتُ جَدَدْتِيهِ وَأَحْتَزْتِيهِ كَانَ لَكَ ذَلِكَ وَإِنَّمَا هُوَ مَالُ الْوَارِثِ وَإِنَّمَا هُوَ أَخْوَاكَ وَأُخْتَاكَ فَاقْتَسِمُوهُ عَلَى كِتَابِ اللَّهِ فَقَالَتْ يَا أَبَتِ وَاللَّهِ لَوْ كَانَ كَذَا وَكَذَا لَتَرَكْتُهُ إِنَّمَا هُوَ أَسْمَاءُ فَمِنْ الْأُخْرَى قَالَ ذُو بَطْنِ بِنْتِ خَارِجَةَ أَرَاهَا جَارِيَةً

Maksud:

Daripada Aisyah r.a.: Abu Bakar r.a. telah memberikan kurma yang telah masak ranum sebanyak (Aisyah) dua puluh wasq (satu wasq bersamaan dengan 60 gantang) daripada kebunnya di Ghabah. Ketika Abu Bakar sedang nazak beliau berkata: Demi Allah wahai anakku sesungguhnya kamu ialah orang yang paling aku sayangi, Sesungguhnya aku telah berikan hartaku kepada kamu buah kurma sebanyak dua puluh wasq. Sekiranya kamu menuai dan mengambilnya, maka harta itu untuk kamu. Akan tetapi ia sekarang telah menjadi harta pusaka. Sesungguhnya ia menjadi milik dua orang saudara lelaki dan perempuanmu. Maka bahagilah ia mengikut kitab Allah SWT. Maka Aisyah berkata: "Demi Allah sekiranya begini halnya, aku tidak akan mengambilnya. Ia untuk Asma' maka siapakah seorang lagi?"¹⁵ Beliau berkata: "Zu Batni binti Kharijah, aku menganggapnya sebagai khadam perempuan."¹⁶

ii. Saidina 'Umar r.a. telah berkata:

رواه مالك عن ابن شهاب عن عروة بن الزبير عن عبد الرحمن بن عبد القاري أن عمر بن الخطاب قال ما بال رجال ينحلون أبناءهم نحلاً ثم يمسكونها فإن مات ابن أحدهم قال مالي بيدي لم أعطه أحداً وإن مات هو قال قد كنت أعطيته إياه من نحل نحلة لم يحزها الذي نحلها حتى تكون إن مات لوارثه فهي باطلة

(رواه البيهقي)

Maksud:

Apa halnya dengan lelaki-lelaki yang memberi harta mereka kepada anak-anaknya, kemudian mereka menanggung pemberian hartanya kepada anak-anaknya. Apabila salah seorang daripada anaknya meninggal dunia, bapa tersebut berkata: "Hartaku adalah milikku, aku tidak berikan kepada seseorang pun." Apabila bapa pula hampir meninggal dunia, dia berkata: "Harta ini untuk anakku, aku telah berikan kepadanya." Maka sesiapa yang memberikan harta (pemberian) tetapi tidak menyerahkan pemberian itu sehingga dia meninggal dunia, harta (pemberian) tersebut adalah untuk ahli warisnya. Pemberian seperti itu terbatal.¹⁷

- iii. Menurut Al-Marwazi sebagaimana yang dinukilkan oleh Ibn Qudamah bahawa Abu Bakar, 'Umar, 'Uthman dan 'Ali RA telah bersepakat tidak mengharuskan hibah kecuali ia *diqabd*¹⁸
- iv. Para Sahabat Rasulullah SAW telah berijmak tentang disyaratkan *qabd* dalam akad hibah berdasarkan dalil yang diriwayatkan oleh Saidatina 'Aisyah tadi dan tiada seorang pun daripada para sahabat ketika itu mengingkarinya.¹⁹

Syarat sah *qabd*

Menurut jumbuh fuqaha, *qabd* sah sekiranya memenuhi syarat-syarat berikut:

- i. Mendapat keizinan dan kebenaran pemberi hibah.²⁰ Pemberi hibah mempunyai pilihan sebelum barang yang dihibahkan itu *diqabd* sama ada mengizinkannya untuk *diqabd* atau menarik balik hibah dan menghalangnya daripada *diqabd* oleh penerima.²¹ Keizinan tersebut tidak hanya sah dengan lafaz izin sahaja bahkan ia juga sah dengan perbuatan yang menunjukkan tanda keizinan sama ada dengan kehadiran pemberi hibah atau sebaliknya.²² Menurut satu riwayat daripada Imam Abu Hanifah, sah *qabd* ketika majlis akad walaupun tidak mendapat keizinan pemberi hibah kerana akad hibah itu sendiri merupakan satu bentuk keizinan untuk *qabd* dan ia menjadi bukti reda pemberi hibah ke atas *qabd*.²³

Manakala menurut mazhab Shafi'i dan Hanbali, tidak sah qabd tanpa izin pemberi hibah sama ada ketika atau selepas majlis akad²⁴ kerana akad hibah bukanlah satu bentuk keizinan untuk *qabd* bahkan perlu kepada keizinan daripada pemberi hibah untuk menyerahkan harta yang dihibahkan. Sekiranya pemberi hibah telah memberi izin *qabd* kepada penerima, kemudian dia menarik balik keizinan tersebut atau menarik balik hibah sebelum berlaku *qabd*, sah penarikan balik tersebut. Namun penarikan balik tersebut tidak sah jika ia berlaku selepas *qabd*.²⁵

Mazhab Shafi'i mensyaratkan keizinan yang diberikan hendaklah secara jelas atau pemberi hibah sendiri menyerahkan dengan tangannya kepada penerima. Namun mazhab Maliki tidak mensyaratkan keizinan pemberi hibah sebagai syarat sah *qabd*.²⁶

- ii. Harta yang dihibah tidak bercampur atau tidak berkait dengan harta lain yang tidak dihibah. Ini kerana, *qabd* bermaksud membolehkan penerima hibah *betasarruf* dengan harta yang dihibah tanpa ada sesuatu yang boleh menghalangnya. Sebagai contoh, seseorang menghibahkan sebuah rumah yang di dalamnya terdapat perkakas atau perhiasan milik pemberi hibah. Pemberi hibah menyerahkan rumah tersebut tanpa mengosongkannya terlebih dahulu. *Qabd* dalam keadaan begini adalah tidak sah kerana mengosongkan rumah tersebut daripada perhiasan milik pemberi hibah ialah syarat sah penerimaan barang yang dihibahkan.²⁷
- iii. Penerima hibah berkeahlian untuk menerima milik harta iaitu baligh dan berakal.²⁸ Oleh itu tidak sah *qabd* daripada seseorang yang gila atau kurang akalnya dan daripada kanak-kanak yang belum baligh walaupun telah mumayyiz menurut pendapat jumhur fuqaha kecuali mazhab Hanafi. Mereka berhujah dengan kaedah *qiyas* kerana *qabd* termasuk dalam masalah *wilayah*. Kanak-kanak yang belum baligh tidak mempunyai kuasa untuk mentadbir dirinya sendiri begitu juga dia tidak mempunyai kuasa untuk *qabd* harta yang dihibahkan kepadanya. Bapa atau wali mereka yang dilantik oleh pihak berkuasa akan mewakili mereka untuk menerima dan mengambil milik harta yang dihibah.²⁹

Manakala mazhab Hanafi tidak mensyaratkan baligh sebagai syarat sah *qabd*. Kanak-kanak yang telah mumayyiz dan berakal boleh menerima milik harta yang dihibahkan kepadanya tanpa perlu diwakilkan kepada walinya. Mereka berhujah berdasarkan kaedah *istihsan* kerana menerima milik harta yang dihibahkan (*qabd*) adalah salah satu daripada perbuatan atau tindakan yang semata-mata memberi manfaat kepada penerima hibah.³⁰

Kematian salah seorang yang berakad sebelum *qabd*

Fuqaha berselisih pendapat tentang kedudukan hibah apabila berlaku kematian salah seorang daripada yang berakad sebelum berlaku *qabd* daripada penerima hibah.

- i. Juhur fuqaha daripada mazhab Syafi'i dan sebahagian fuqaha Hanbali berpendapat, apabila meninggal dunia salah seorang daripada yang berakad hibah sebelum *diqabd* barang yang dihibahkan, maka tidak terbatal akad tersebut bahkan warisnya akan menggantikan tempatnya sama ada memberi izin *qabd* atau memfasakhkan akad tersebut ataupun waris penerima meng*qabd* barang yang dihibah atau menolaknya.³¹ Namun sekiranya salah seorang daripada mereka meninggal dunia sebelum berlaku *qabd* daripada penerima, maka terbatal akad hibah tersebut kerana akad masih belum sempurna ketika berlaku kematian.³²
- ii. Mazhab Hanbali berpendapat, akad hibah terbatal dengan kematian salah seorang daripada yang berakad sama ada sebelum atau selepas diberi keizinan *qabd* seperti akad *wakalah* dan *syirkah*. Sekiranya pemberi hibah meninggal dunia sebelum barang yang dihibahkan itu sampai kepada penerima atau sebelum berlaku *qabd*, maka barang yang dihibah itu akan kembali kepada waris pemberi hibah. Begitu juga sekiranya pemberi menarik balik hibahnya sebelum ia sampai kepada penerima maka sah penarikan balik tersebut.³³
- iii. Mazhab Hanafi berpendapat, kematian salah seorang yang berakad hibah sebelum berlaku *qabd* menyebabkan akad tersebut terbatal. Pemilikan harta yang ingin dihibahkan berpindah milik kepada waris si mati kerana akad hibah belum sempurna ketika berlaku kematian.³⁴

Bagi fuqaha yang tidak menjadikan *qabd* sebagai syarat dalam akad hibah seperti Imam Malik, Abu Thaur dan mazhab Al-Zahiri, kematian salah satu pihak yang berakad sebelum *qabd* tidak membatalkan akad tersebut bahkan ia berkuat kuasa dengan ijab dan qabul sahaja.

Penarikan balik hibah

a. Penarikan balik hibah sebelum *qabd*

Fuqaha berselisih pendapat tentang hukum penarikan balik hibah sebelum *qabd* iaitu:

- i. Mazhab Hanafi, Shafi'i, Imamiyyah, Zaiydiyyah dan satu riwayat daripada mazhab Hanbali mengharuskan penarikan balik hibah sebelum *qabd* (Hasan 2004: 69). Mereka berhujah berdasarkan ijmak para sahabat Rasulullah SAW yang mengharuskan penarikan balik hibah sebelum *qabd* (Ibn Qudamah t.th.: 247) dan ia dikuatkan lagi dengan hujah-hujah yang telah dikemukakan sebelum ini dalam masalah keperluan *qabd* dalam akad hibah.
- ii. Mazhab Maliki dan Zahiri tidak mengharuskan penarikan balik hibah sebelum *qabd*. Mereka berhujah berdasarkan firman Allah SWT :

... يَا أَيُّهَا الَّذِينَ آمَنُوا أَوْفُوا بِالْعُقُودِ

Terjemahan:

“Wahai orang yang beriman, penuhi serta sempurnakanlah perjanjian-perjanjian...”

(Surah al-Maidah, ayat 1)

Akad hibah berkuat kuasa dengan lafaz *ijab* dan *qabul* dari pemberi dan penerima sehingga memberi kesan kewajipan menunaikan janji yang telah diakad tanpa perlu kepada *qabd*. Mereka juga berhujah dengan logik akal dengan mengatakan bahawa akad hibah adalah seperti akad-akad lain yang tidak perlu kepada *qabd* sebagai syarat sah sesuatu akad.³⁵

iii. Mazhab Hanbali daripada riwayat yang lain mengharuskan penarikan balik hibah sebelum *qabd* sekiranya barang yang dihibahkan itu berbentuk barang yang disukat atau ditimbang. Namun sekiranya barang yang dihibah itu tidak boleh disukat atau ditimbang, tidak harus menarik balik hibah tersebut sebelum berlakunya *qabd*.³⁶

b. Penarikan balik hibah selepas *qabd*

Penarikan balik hibah yang telah sempurna dengan *qabd* oleh penerima hibah selain dari hibah seorang bapa kepada anaknya juga telah menjadi perselisihan fuqaha tentang keharusan. Perselisihan tersebut terbahagi kepada tiga pendapat iaitu:

Pendapat pertama yang merupakan pendapat mazhab Shafi'i, Hanbali, Abu Thauri, Ibn Hazm, Daud al-Zahiry dan sahabat-sahabatnya. Mereka berpendapat bahawa hibah yang telah sempurna³⁷ tidak harus bagi pemberi hibah menarik balik hibahnya.³⁸ Mereka berhujah dengan dalil-dalil berikut:

i. Firman Allah SWT :

يَا أَيُّهَا الَّذِينَ آمَنُوا أَوْفُوا بِالْعُقُودِ ...

Terjemahan:

“Wahai orang-orang yang beriman, penuhi serta sempurnakanlah perjanjian-perjanjian ...”

(Surah al-Maidah : 1)

Hibah merupakan akad yang wajib ditunaikan dan tidak harus ditarik balik.

ii. Sabda Rasulullah SAW:

... الْعَائِدُ فِي هَبْتِهِ كَالْكَلْبِ يَقِيءُ ثُمَّ يَعُودُ فِي قَيْئِهِ

Maksud:

Orang yang menarik balik hibahnya seperti anjing yang muntah kemudian memakan muntahnya kembali.

- iii. Sabda Rasulullah SAW lagi sebagaimana yang diriwayatkan oleh Ibn Abbas dan Ibn Umar:

عن يزيد ومحمد بن جعفر عن حسين المعلم عنه عن طاوس عن ابن عمر وابن عباس به لا يحل للرجل أن يعطي العطيّة ثم يرجع فيها إلا الوالد فيما يعطي ولده

(رواه بخاري ومسلم وأبو داود والترمذي)

Maksud:

Tidak halal bagi seseorang yang memberi hibah menarik balik hibahnya kecuali hibah bapa kepada anaknya. (Al-Qazwini t.th.: 2:295)

Rasulullah SAW menyamakan penarikan balik hibah dengan satu gambaran yang teruk yang di luar tabiat semula jadi manusia yang baik iaitu gambaran seperti anjing yang menelan semula muntahnya.

Pendapat kedua pula merupakan pendapat mazhab Hanafi, Imamiyyah dan Zaydiyyah³⁹ bahawa sekiranya hibah itu diberikan kepada *ajnabi*⁴⁰ dan telah sempurna pemberian hibah dengan qabd oleh penerima hibah, maka tidak terhalang pemberi hibah daripada menarik balik hibah yang telah diberikan kecuali jika terdapat salah satu daripada perkara yang menghalang penarikan balik hibah.⁴¹ Sungguhpun begitu, menurut fuqaha mazhab Hanafi ia makruh dan tidak digalakkan.⁴²

Perkara-perkara yang menghalang penarikan balik hibah menurut mazhab Hanafi:⁴³

- i. Berlaku pertambahan yang tidak boleh dipisahkan pada barang yang dihibah sama ada disebabkan oleh perbuatan penerima hibah atau orang lain. Sebagai contoh, penerima hibah menambah binaan baru ke atas rumah yang dihibahkan kepadanya ataupun penerima hibah menjahit kain yang dihibahkan kepadanya menjadi baju kemeja.⁴⁴ Pertambahan tersebut tidak termasuk pertambahan nilai kerana pertambahan nilai tidak menjejaskan barang yang dihibah kekal pada bentuk asalnya. Begitu juga jika pertambahan itu

berasingan atau sesuatu yang boleh diasingkan daripada barang asal yang dihibahkan seperti buah dari kebun yang dihibahkan kerana pemberi hibah boleh menarik balik hibah kebun tersebut manakala buah hasil kebun menjadi milik penerima hibah.

- ii. Kematian salah seorang daripada dua orang yang berakad hibah selepas berlaku penyerahan. Ini kerana, sekiranya penerima hibah meninggal dunia, barang yang dihibah akan menjadi milik ahli warisnya. Begitu juga sekiranya pemberi hibah yang meninggal dunia, maka ahli warisnya tiada hak untuk menarik balik hibah tersebut.⁴⁵

Namun hibah akan terbatal sekiranya berlaku kematian salah seorang daripada dua orang yang berakad sebelum berlaku penyerahan barang yang dihibahkan (*qabd*). Pemilikan barang yang dihibah berpindah kepada ahli waris pemberi hibah sebelum sempurnanya proses pemberian hibah. Oleh itu penarikan balik hibah tidak berlaku kerana akad hibah dikira terbatal dengan kematian salah seorang daripada mereka sebelum sempurna penerimaan hibah.

- iii. Wujud syarat pertukaran atau balasan. Penerima hibah menggantikan hibah yang telah diberikan oleh pemberi hibah dengan sesuatu balasan sebagaimana yang disyaratkan oleh pemberi hibah.⁴⁶
- iv. Penerima hibah telah menjalankan urus niaga terhadap harta yang dihibah dan ia bukan lagi menjadi milik pemberi hibah. Sebagai contoh, penerima hibah pertama telah menghibahkan harta tersebut kepada penerima hibah kedua, menyebabkan pemberi hibah pertama terhalang dari menarik balik hibahnya. Namun sekiranya penerima hibah pertama telah menarik balik hibah tersebut daripada penerima hibah kedua, maka pemberi hibah pertama boleh menarik balik hibahnya daripada penerima hibah pertama.
- v. Hibah yang dibuat oleh suami atau isteri, kerana tujuan hibah tersebut adalah atas dasar kasih sayang tanpa mengharapkan balasan berbanding dengan hibah kepada orang lain. Pemberian hibah tersebut hendaklah berlaku ketika pasangan suami isteri berada dalam ikatan perkahwinan. Sekiranya seorang lelaki menghibahkan sesuatu kepada seorang perempuan kemudian mereka berkahwin,

maka suami mempunyai hak untuk menarik balik hibah yang berlaku sebelum perkahwinan.⁴⁷ Namun sekiranya, pemberian hibah berlaku ketika dalam ikatan perkawinan, salah seorang daripada mereka tidak boleh menarik balik hibah tersebut walaupun selepas perceraian.

- vi. Pemberian hibah kepada seseorang yang mempunyai hubungan kekeluargaan (kerabat) yang diharamkan berkahwin dengannya.⁴⁸ Halangan penarikan balik hibah disebabkan tujuan pemberian hibah tersebut adalah untuk merapatkan hubungan silatur rahim sesama mereka. Sikap saling tolong-menolong dan bantu-membantu antara mereka menjadi wasilah atau jalan untuk mendapat ganjaran dan pertolongan di akhirat kelak dan ia lebih bernilai daripada harta.⁴⁹
- vii. Harta hibah telah rosak atau telah hilang manfaatnya. Tidak boleh juga menarik balik hibah dengan nilai barang yang telah rosak kerana nilai barang yang dihibah tidak disebut ketika berakad dan penerimaan hibah tidak dikenakan gantian.⁵⁰

Sekiranya salah satu daripada halangan penarikan balik hibah tersebut tiada, maka sah penarikan balik hibah namun dengan syarat mendapat persetujuan dan keredaan pemberi dan penerima hibah atau melalui perintah mahkamah.⁵¹

Golongan ini berhujah dengan dalil-dalil berikut:

- a. Sabda Rasulullah SAW sebagaimana yang diriwayatkan oleh Abu Hurairah:

عن عمر بن دينار عن أبي هريرة قال قال رسول الله صلى الله عليه وسلم الرجل أحقُّ بهبته ما لم يُثبَّ منها
(رواه أبو داود)

Maksud:

Pemberi hibah lebih berhak terhadap hibahnya yang tidak memberi apa-apa ganjaran daripadanya. (Al-Qazwini t.th. 2: 798)

Hadis tersebut menjelaskan bahawa setiap hibah yang tidak ada gantian atau balasan yang diterima oleh pemberi hibah, dia mempunyai hak menarik kembali hibahnya.⁵²

- b. Mereka berhujah bahawa tujuan hibah adalah untuk mendapat balasan daripada kebiasaannya. Manusia akan memberi sesuatu kepada orang atasannya untuk mendapat perlindungan dengan pangkat dan kuasa yang ada, memberi sesuatu kepada orang bawahan untuk mendapat khidmat mereka dan memberikan sesuatu kepada orang yang sama taraf adalah untuk mendapat balasan daripadanya. Oleh itu sekiranya hilang tujuan pemberian hibah maka pemberi hibah mempunyai kuasa untuk membatalkan hibah tersebut seperti pembeli boleh membatalkan akad jual belinya jika terdapat aib pada barang yang dibeli.
- c. Hibah yang diberikan kepada seseorang yang mempunyai hubungan kekeluargaan yang tidak boleh dikahwini (mahram) tidak sah ditarik balik kerana ia boleh memutuskan hubungan silatur rahim antara pemberi dan penerima hibah.⁵³ bersandarkan kepada hadis yang diriwayatkan oleh Samrah bahawa Nabi SAW bersabda:

حدثنا عبد الله بن جعفر عن عبد الله بن المبارك عن حماد بن سلمة عن قتادة عن الحسن عن سمرة عن النبي صلى الله عليه وسلم قال إِذَا كَانَتِ الْهِبَةُ لِذِي رَحِمٍ مَحْرَمٍ لَمْ يَرْجَعْ فِيهَا
(رواه البيهقي)

Maksud:

Sekiranya hibah diberikan kepada kerabat kamu yang tidak boleh dikahwini ia tidak boleh ditarik balik. (Al-Baiyhaqi 1994, 6: 181)

Hadis tersebut membuktikan bahawa pemberi hibah lebih berhak menarik balik hibah yang telah diberikan kepada selain daripada saudara mara yang haram dikahwini.⁵⁴ Namun menurut Al-Bayhaqi, hadis tersebut tidak kuat kerana

diriwayatkan melalui satu sanad sahaja⁵⁵ dan ia disokong oleh Al-Darqutni dalam sunan beliau.⁵⁶

- d. Pemberi hibah yang tidak mendapat apa-apa balasan daripada penerima hibah atas pemberian hibahnya berhak menarik balik hibah tersebut sepertimana akad pinjaman. Sekiranya akad pinjaman boleh ditarik balik kerana tiada balasan begitu juga dengan hibah kerana kedua-duanya merupakan akad *tabarru'*.

Namun begitu, Ibn al-Jauzi berkata sebagaimana yang dinukilkan oleh Hasan bahawa hadis yang telah diriwayatkan oleh Abu Hurairah dan Samrah adalah lemah.⁵⁷

Pendapat ketiga merupakan pendapat al-Nakhaie, al-Thauri dan Ishak bahawa hibah boleh ditarik balik sekiranya diberikan kepada selain dari kaum kerabat dan hibah yang tiada syarat balasan walaupun telah sempurna penyerahan hibah tersebut.⁵⁸ Mereka berhujah dengan athar saidina Umar:

حدثنا أبو معاوية عن الأعمش عن إبراهيم عن الأسود عن عمر قال مَنْ
وَهَبَ هِبَةً لِدَيِّ رَحِمٍ فَهِيَ جَائِزَةٌ وَمَنْ وَهَبَ هِبَةً لِغَيْرِ دِيٍّ رَحِمٍ فَهُوَ أَحَقُّ
بِهَا مَا لَمْ يَثْبُ عَلَيْهِ.

Maksud:

*Sesiapa yang memberi hibah kepada seseorang yang mempunyai hubungan kekeluargaan dengannya adalah harus, dan sesiapa yang memberi hibah kepada selain daripada yang mempunyai hubungan keluarga dengannya dia lebih berhak ke atas hibah tersebut kerana tidak mendapat apa-apa ganjaran daripadanya.*⁵⁹

Berdasarkan *athar* di atas, tidak harus menarik balik pemberian hibah kepada seseorang yang mempunyai hubungan kekeluargaan sama ada boleh dikahwini atau pun tidak dengan tidak mengkhususkan kepada keluarga yang boleh dikahwini sahaja seperti pendapat mazhab Hanafi.

Penarikan balik hibah bapa kepada anak

Jumhur fuqaha daripada mazhab Maliki, Shafi'i, Hanbali dan Zahiri berpendapat bahawa bapa diwajibkan menarik balik hibah yang telah diberikan kepada anak⁶⁰ dengan beberapa syarat tertentu sama ada tujuan penarikan balik tersebut untuk memberi kesamarataan pemberian di kalangan anak-anak atau tanpa tujuan tersebut.⁶¹ Namun menurut mazhab Shafi'i, sekiranya pemberian tersebut telah diberikan secara adil antara anak-anak dan tiada apa-apa keuzuran yang menyebabkan bapa menarik balik hibahnya seperti anak telah derhaka atau pemberian tersebut menyumbang kepada kemaksiatan yang dilakukan oleh anak, maka hukum bapa menarik balik hibahnya adalah makruh.⁶²

Jumhur fuqaha mengharuskan penarikan balik hibah bersandarkan kepada sabda Rasulullah SAW yang diriwayatkan oleh Ibn Abbas dan Ibn Umar:

ثَنَا حَسِينُ الْمَعْلَمِ عَنْ عَمْرٍو عَنْ شَعِيبٍ عَنْ طَاوُسٍ عَنْ ابْنِ عَمْرِو بْنِ عَبَّاسٍ رَضِيَ اللَّهُ عَنْهُمْ عَنِ النَّبِيِّ صَلَّى اللَّهُ عَلَيْهِ وَسَلَّمَ قَالَ لَا يَحِلُّ لِلرَّجُلِ أَنْ يُعْطِيَ عَطِيَّةً أَوْ يَهْبُ هِبَةً فَيَرْجِعُ فِيهَا إِلَّا الْوَالِدُ فِيمَا يُعْطِي وَلَدَهُ وَمَثَلُ الَّذِي يُعْطِي الْعَطِيَّةَ ثُمَّ يَرْجِعُ فِيهَا كَمَثَلِ الْكَلْبِ يَأْكُلُ فَإِذَا شَبِعَ قَاءَ ثُمَّ عَادَ فِي قَيْئِهِ

Maksud:

Tidak halal bagi seseorang yang memberi pemberian atau hibah menarik balik hibahnya kecuali hibah bapa kepada anaknya, dan diumpamakan orang yang menarik balik hibahnya seperti anjing yang makan apabila telah kenyang dia memuntahkannya kemudian dia kembali memakan muntahnya. (Al-Hakim 1990, 2:53)

Mazhab Hanafi, al-Thawuri dan satu riwayat lain daripada Imam Ahmad berbeza pendapat dengan jumhur fuqaha dengan tidak mengharuskan penarikan balik hibah bapa kepada anaknya.⁶³ Mereka berhujah berdasarkan sabda Rasulullah SAW :

العَائِدُ فِي هَبَّتِهِ كَالْكَلْبِ يَتَّقِيءُ ثُمَّ يَعُودُ فِي قَيْئِهِ

(Riwayat al-Bukhari)

Terjemahan:

Orang yang menarik balik hibahnya seperti anjing yang muntah kemudian memakan muntahnya kembali.

Saidina ‘Umar pula telah berkata: “Sesiapa menghibahkan sesuatu dengan tujuan untuk mengeratkan silaturrahim atau bertujuan untuk bersedekah maka tidak harus menarik balik hibahnya.”⁶⁴

Jumhur fuqaha telah berselisih pendapat tentang siapakah selain bapa yang dikira hukumnya sebagai bapa yang diharuskan menarik balik hibah yang telah diberikan kepada anak:

- i. Mazhab Maliki berpendapat bahawa keharusan menarik balik hibah hanya diberikan kepada bapa sahaja⁶⁵ sama ada anak tersebut lelaki ataupun perempuan, kanak-kanak atau dewasa, kaya atau miskin dengan syarat harta yang dihibah masih menjadi milik anak dan tidak terikat dengan hak orang lain.⁶⁶ Namun ibu juga berhak menarik balik hibah daripada anaknya yang masih mempunyai bapa tidak kira anak tersebut masih kecil atau telah dewasa. Tetapi sekiranya anak tersebut masih kecil dan telah kematian bapa, ibu tidak diharuskan menarik balik hibah walaupun pemberian itu sebelum kematian bapanya kerana anak kecil yang kematian bapa dikira sebagai anak yatim yang dilarang menarik balik hibah daripadanya seperti hukum sedekah.⁶⁷
- ii. Mazhab Shafi’i dan Hanbali pula berpendapat penarikan balik hibah diharuskan kepada bapa dan *usulnya* iaitu datuk dan nenek, begitu juga kepada ibu dan *usulnya*⁶⁸ walaupun berlainan agama menurut pendapat yang masyhur. Keharusan tersebut tanpa melihat kepada kedudukan anak sama ada ia miskin atau kaya dan sama ada ia masih kecil ataupun telah dewasa dan juga sama ada sebelum atau selepas *qabd*⁶⁹ berdasarkan sabda Rasulullah SAW sebagaimana yang diriwayatkan oleh Ibn Abbas dan Ibn Umar yang mengharuskan penarikan balik hibah daripada seorang bapa kepada

anaknyanya.⁷⁰ Keharusan datuk atau nenek menarik balik hibah yang telah diberikan kepada cucunya adalah dengan bersandarkan ayat-ayat Allah SWT yang menggunakan lafaz bapa untuk datuk seperti firman Allah SWT:

... وَأَتَّبَعْتُ مِلَّةَ آبَائِي إِبْرَاهِيمَ وَإِسْحَاقَ وَيَعْقُوبَ ...

(Surah Yusuf, ayat 38)

Maksud:

... dan aku menurut agama bapa dan datuk nenekku: Ibrahim dan Ishak serta Yaakub ...

Lafaz آبائي yang bermaksud bapa-bapaku telah digunakan untuk Nabi Ibrahim dan Nabi Ishak yang merupakan datuk kepada Nabi Yusuf a.s. Oleh itu, kedudukan datuk dan nenek adalah sama dengan kedudukan bapa yang diberi keharusan menarik balik hibah yang telah diberikan kepada cucunya sebagaimana keharusan yang diberikan kepada bapa dan ibu.⁷¹

Syarat-syarat yang mengharuskan penarikan balik hibah mengikut pendapat fuqaha:

- i. Harta yang dihibahkan masih menjadi milik anak yang menerima hibah. Sekiranya harta atau barang yang dihibah itu telah menjadi milik orang lain sama ada telah dijual, telah diwakafkan atau telah dihibahkan dan telah berlaku *qabd* maka bapa tidak harus menarik kembali hibahnya. Ia merupakan syarat yang ditetapkan oleh mazhab Maliki, Shafi'i dan Hanbali.⁷²
- ii. Harta atau barang yang dihibahkan masih berada di dalam jagaan atau urusan anak yang menerima hibah. Sekiranya anak telah menggadaikan barang yang dihibahkan oleh bapanya atau pun dia telah mufis dan ditegah daripada menguruskan hartanya, maka bapa tidak boleh menarik balik hibah tersebut bagi menjaga kepentingan pemiutang atau orang yang memegang barang gadaian tersebut. Namun sekiranya barang yang dicagarkan tadi telah menjadi milik anak yang menerima hibah kerana telah diselesaikan

hutangnya, maka bapa berhak menarik balik hibah tersebut. Ia merupakan pendapat mazhab Hanbali.⁷³ Namun begitu, fuqaha mazhab Shafi'i tidak menjadikan gadaian dan pinjaman atas tanah yang dihibah sebagai halangan untuk bapa menarik balik hibahnya kerana barang yang dihibah masih di bawah penguasaan anak. Dikecualikan dalam masalah ini, sekiranya bapa telah gila, maka dia atau walinya tidak boleh menarik balik hibah yang telah diberikan kepada anak walaupun harta tersebut masih di bawah penguasaan anak kerana tidak sah penarikan balik ketika dalam keadaan gila sehinggalah dia telah sihat.⁷⁴

- iii. Hibah yang diberikan bukan menjadi sebab orang menyukai anak yang menerima hibah atau mendapat kedudukan dalam masyarakat. Sebagai contoh, disebabkan pemberian hibah seorang bapa kepada anaknya masyarakat sekeliling ingin bermuamalah, berhutang atau memberi hutang atau berkahwin dengan anak yang menerima hibah tersebut. Dalam masalah ini, bapa tidak diharuskan menarik balik hibah menurut pendapat mazhab Maliki dan juga menurut satu riwayat daripada Imam Ahmad kerana hibah tersebut berkait dengan hak orang lain selain anak yang menerima hibah. Penarikan balik hibah tersebut akan mendatangkan kemudaratkan ke atas orang lain dan ia dilarang dalam Islam⁷⁵ sebagaimana sabda Rasulullah SAW:

عن عبادة بن صامت أن رسول الله صلى الله عليه وسلم قال لا ضرر ولا ضرار
(رواه الحاكم)

Terjemahan:

"Tidak boleh mudarat dan memudaratkan." (Al-Hakim 1990, 2:66)

Namun Imam Ahmad dalam riwayat lain berpendapat bahawa dalam situasi tersebut bapa diharuskan menarik balik hibahnya berdasarkan sabda Rasulullah SAW:

عن يزيد ومحمد بن جعفر عن حسين المعلم عنه عن طاوس عن ابن عمر
وابن عباس به لا يحل للرجل أن يعطي العطيّة ثم يرجع فيها إلا الوالد
فإنما يعطي ولده

(رواه بخاري ومسلم وأبو داود والترمذي)

Maksud:

Tidak halal bagi seseorang memberi sesuatu pemberian kemudian dia menarik balik pemberian tersebut kecuali apa yang diberi oleh bapa kepada anaknya. (Al-Qazwini t.th.: 2:295)

- iv. Tidak berlaku pertambahan yang tidak boleh diasingkan atau dipisahkan pada barang yang dihibah seperti lemak atau gemuk. Ia merupakan salah satu riwayat daripada Imam Ahmad yang tidak mengharuskan bapa menarik balik hibah daripada anaknya yang telah berlaku pertambahan yang tidak boleh diasingkan. Menurut mazhab Maliki pertambahan atau pengurangan yang berlaku ke atas barang yang dihibahkan kepada anak dihalang daripada ditarik balik oleh bapa.⁷⁶

Namun terdapat riwayat lain daripada beliau dan juga pendapat mazhab Shafi'i yang mengharuskan bapa menarik balik hibah jika berlaku pertambahan yang tidak boleh diasingkan daripada barang yang dihibah. Begitu juga pertambahan yang boleh diasingkan atau dipisahkan daripada barang yang dihibah seperti buah-buahan dari kebun yang telah dihibah, bapa diharuskan menarik balik hibahnya menurut mazhab Shafi'i.⁷⁷

- v. Tidak bertujuan untuk mendapat balasan atau ganjaran di akhirat atau untuk mengeratkan hubungan silatur rahim dan kasih sayang antara mereka menurut pendapat mazhab Maliki.

Kesimpulan

Perselisihan fuqaha berkaitan hukum penarikan balik hibah ini adalah berhubung kait dengan pendapat fuqaha serta hujah mereka berkaitan dengan keperluan *qabd* dalam akad hibah. Golongan yang berpendapat

bahawa hibah tidak berkuat kuasa tanpa *qabd*, mengharuskan penarikan balik hibah sebelum *qabd*. Sebaliknya golongan yang berpendapat bahawa *qabd* bukan syarat berkuat kuasanya hibah dan hibah berlaku hanya dengan akad, tidak mengharuskan penarikan balik hibah sebelum *qabd*.

Namun dalam masalah penarikan balik hibah selepas *qabd* jumhur fuqaha kecuali mazhab Hanafi, Imamiyyah dan Zaidiyah berpendapat tidak harus menarik balik hibah setelah sempurna akad dan *qabd*. Mereka berpendapat, akad hibah sempurna dan berkuat kuasa dengan sempurnanya *qabd* oleh penerima hibah. Manakala mazhab Hanafi, Imamiyyah dan Zaidiyah mengharuskan penarikan balik hibah yang telah sempurna *qabd* daripada penerima hibah yang bukan tergolong daripada kaum kerabat yang tidak boleh dikahwini. Pemberi hibah lebih berhak ke atas harta yang dihibah namun hubungan kekeluargaan atas dasar pertalian darah dan kasih sayang perlu dipelihara agar ia tidak musnah dengan penarikan balik hibah. Oleh itu, golongan ini tidak mengharuskan penarikan balik hibah seorang bapa kepada anaknya bertentangan dengan pendapat jumhur fuqaha yang mengharuskannya. Mazhab Hanafi juga tidak mengharuskan penarikan balik hibah yang dibuat dengan syarat balasan.

Keperluan *qabd* dalam hibah adalah bertujuan bagi memastikan kesungguhan pemberi hibah menghibahkan barang yang dihibah kepada penerima dan membuktikan kerelaan penerima hibah menerima hibah yang diberikan sama ada ia berbentuk harta alih atau pun harta tak alih. Ini kerana, penerima hibah mempunyai pilihan sama ada menerima atau menolak pemberian tersebut. Begitu juga dengan pemberi hibah, dia berhak menarik balik pemberiannya sekiranya dia berhajat kembali kepada barang yang dihibah selagi tidak diterima milik atau *diqabd* oleh penerima hibah. Antara bentuk *qabd* yang perlu dilaksanakan oleh penerima hibah adalah sama ada dengan mengambil terus barang yang dihibahkan, mengambil milik surat hak milik (geran tanah), menyelesaikan pertukaran hak milik, mengerjakan atau menduduki tanah ataupun rumah yang dihibah, mengambil kunci rumah ataupun menandatangani borang-borang berkaitan sebagai tanda penerimaan.

Oleh itu, kedudukan *qabd* dalam hibah adalah berhubung kait



dengan hukum penarikan balik hibah. Hibah sempurna dan berkuat kuasa dengan sempurnanya *qabd* oleh penerima hibah. Akad yang telah sempurna tidak diharuskan untuk ditarik balik atau dibatalkan oleh pemberi hibah kecuali dalam masalah pemberian hibah seorang bapa kepada anaknya.



Nota Hujung

1. Ibn Manzur, Jamal al-Din Muhammad bin Mukram (1427H/2006M), *Lisan al-Arab*, jil. 11, Riyadh: Dar al-Akhyar, hlm 10.
2. M. Rauwwas Qal'ah Ji et.al. (1405H/1985M), *Mu'jam Lughah al-Fuqaha'*. Beirut: Dar al-Nafais, hlm356.
3. Al-Kasani, 'Ala' al-Din Abi Bakr bin Mas'ud. 1419H/1998M. *Badai' al-Sanai' Fi Tartib al-Syarai'*. 'et.2. Beirut: Dar Ihya' al-Turath al-'Arabi, hlm171.
4. Ibn Qudāmah, 'Abd Allah bin Ahmad. t.thlm *al-Mughni*. Juz. 6. Beirut: Dār al-Kitāb al-'Arabi, hlm 251.
5. Ibn Rushd, Muhammad bin Ahmad. 1416H/1996M. *Bidayah al-Mujtahid wa Nihayah al-Muqtasid*. Beirut: Dar al-Kutub al-Ilmiyyah.
6. Al-Nawawi, Abi Zakaria Muhyiddin bin Syarf. 1415H/1995M. *Kitab al-Majmu' Syarh al-Muhazzab li al-Syirazi*. Jeddah: Maktabah al-Irsyad.
7. Inas Abbas Ibrahim. 1413H/1993M, *Hibah al-aba' li abnaihlm hlm al-hayahlm* Majalah al-Shari'ah wa al-Dirasat al-Islamiyyahlm Kuwait: Majlis al-Nasyr al-'Ilmi Fi Jamia'ah al-Kuwait. Bil. 19.
8. Ibn Rushd, Muhammad bin Ahmad. 1416H/1996M. *Bidayah al-Mujtahid wa Nihayah al-Muqtasid*. Beirut: Dar al-Kutub al-Ilmiyyah hlm 363.
9. Ibn Qudāmah, 'Abd Allah bin Ahmad. t.th: 251. *al-Mughni*. Juz. 6. Beirut: Dār al-Kitāb al-'Arabi. hlm 363.
10. Ibn Rushd, Muhammad bin Ahmad. 1416H/1996M. *Bidayah al-Mujtahid wa Nihayah al-Muqtasid*. Beirut: Dar al-Kutub al-Ilmiyyah hlm 362 .
11. Inas Abbas Ibrahim. 1413H/1993M, *Hibah al-aba' li abnaihlm hlm al-hayahlm* Majalah al-Shari'ah wa al-Dirasat al-Islamiyyahlm Kuwait: Majlis al-Nasyr al-'Ilmi Fi Jamia'ah al-Kuwait. Bil. 19. Hlm 71.
12. Al-Bukhari, Muhammad bin Ismail. 1407H/1987M. *Al-Jami' al-Sahih al-Muhtasar*. 'et.3. Beyrut: Dar Ibn Kathir. Jld. 5. Hlm 915.
13. Ibn Qudāmah, 'Abd Allah bin Ahmad. t.thlm *al-Mughni*. Juz. 6. Beirut: Dār al-Kitāb al-'Arabi. Hlm 247.
14. Muhammad Husni Ibrahim Salim. 1415H/1994M. *Al-Hibah fi Al-Fiqh* Al-Islamiy Dirasah Muqaranahlm Kaherah: Dar al-Taba'ah al-Muhammadiyahlm Hlm 30.

15. “Zu Batni” yang dimaksudkan oleh Abu Bakar ialah anak perempuan dalam kandungan Habibah binti Kharijah yang hamil dengannya dan bayi tersebut lahir selepas kewafatannya. Ibn Hajr, *Al-Isabah fi Hayati Al-Sahabah*, Jil. 8, hlm 80.
16. Al-Bayhaqi, Ahmad bin al-Husin. 1414H/1994M. *Sunan al-Bayhaqi al-Kubra*. Mekkah: Maktabah Dar al-Baz Jld. 6, Hlm 169.
17. Al-Bayhaqi, Ahmad bin al-Husin. 1414H/1994M. *Sunan al-Bayhaqi al-Kubra*. Mekkah: Maktabah Dar al-Baz Jld. 6, Hlm 170.
18. Ibn Qudāmah, ‘Abd Allah bin Ahmad. t.thlm *al-Mughni*. Juz. 6. Beirut: Dār al-Kitāb al-‘Arabi.Hlm 250.
19. Ibn Qudāmah, ‘Abd Allah bin Ahmad. t.thlm *al-Mughni*. Juz. 6. Beirut: Dār al-Kitāb al-‘Arabi. Hlm 247.
20. Al-Sharbini, Muhammad bin Muhammad al-Khatib. 1415H/1994M. *Mughni al-Muhtaj Ila Ma’rifat Ma’ani Alfaz al-Minhaj*. Juz.3. Beirut: Dar al-Kutub al-‘Ilmiyyah Hlm 565.
21. Al-Nawawi, Abi Zakaria Muhyiddin bin Syarf. 1415H/1995M. *Kitab al-Majmu’ Syarh al-Muhazzab li al-Syirazi*. Jeddah: Maktabah al-Irsyad. Hlm 350.
22. Inas Abbas Ibrahim. 1413H/1993M, *Hibah al-aba’ li abnaihlm hlm al-hayahlm* Majalah al-Shari’ah wa al-Dirasat al-Islamiyyahlm Kuwait: Majlis al-Nasyr al-‘Ilmi Fi Jamia’ah al-Kuwait. Bil. 19. Hlm 73.
23. Ibn Qudāmah, ‘Abd Allah bin Ahmad. t.thlm *al-Mughni*. Juz. 6. Beirut: Dār al-Kitāb al-‘Arabi. Hlm 248.
24. Al-Sharbini, Muhammad bin Muhammad al-Khatib. 1415H/1994M. *Mughni al-Muhtaj Ila Ma’rifat Ma’ani Alfaz al-Minhaj*. Juz.3. Beirut: Dar al-Kutub al-‘IlmiyyahlmHlm 565.
25. Ibn Qudāmah, ‘Abd Allah bin Ahmad. t.thlm *al-Mughni*. Juz. 6. Beirut: Dār al-Kitāb al-‘Arabi. Hlm 248-249. Al-Nawawi, Abi Zakaria Muhyiddin bin Syarf. 1415H/1995M. *Kitab al-Majmu’ Syarh al-Muhazzab li al-Syirazi*. Jeddah: Maktabah al-Irsyad.Hlm 350.
26. Al-Zuhayli, Wahbahlm 1409H/1989M. *Al-Fiqh al-Islamiy wa Adillatuhlm* ‘et.3. Damsyiq: Dar al-Fikr. Hlm 21.
27. Inas Abbas Ibrahim. 1413H/1993M, *Hibah al-aba’ li abnaihlm hlm al-hayahlm* Majalah al-Shari’ah wa al-Dirasat al-Islamiyyahlm Kuwait: Majlis al-Nasyr al-‘Ilmi Fi Jamia’ah al-Kuwait. Bil. 19. Hlm 73.

28. Mustafa Khin et.al. 1427H/2006M. *al-Fiqh al-Manhaji ala Mazahib al-Imam al-Syafi'i*. Jil.3. Damsyiq:Dar al-Qalam. hlm 113-114.
29. Inas Abbas Ibrahim. 1413H/1993M, *Hibah al-aba' li abnaihlm hlm al-hayahlm* Majalah al-Shari'ah wa al-Dirasat al-Islamiyyahlm Kuwait: Majlis al-Nasyr al-'Ilmi Fi Jamia'ah al-Kuwait. Bil. 19. Hlm 73-74.
30. Inas 1993, hlm 73-74.
31. Al-Nawawi 1995: 351; al-Sharbini 1994: 566.
32. Ibn Qudamah t.th. hlm 250.
33. Ibn Qudamah t.th. hlm 249.
34. Muhammad Husni 1994, hlm 103.
35. Hasan 2004, hlm 72.
36. Hasan 2004, hlm 72.
37. Hibah yang sempurna menurut mazhab Syafi'i dan Hanbali ialah barang yang dihibah telah diterima oleh penerima hibah (*qabd*) dan menjadi miliknya. Manakala menurut mazhab Zahiri, hibah dikira sempurna dengan sempurnanya akad.
38. Ibn Qudamah t.t., hlm 290.
39. Hasan 2004, hlm 73.
40. Sesiapa yang bukan tergolong daripada kaum kerabat yang menjadi mahram kepada pemberi hibah
41. Muhammad Husni 1994, hlm 100.
42. Al-Qadiri 1997, 7 hlm 494.
43. Muhammad Husni 1994, hlm 101.
44. Al-Zuhayli 1989, hlm 31.
45. Al-Qadiri 1997, hlm 497; Al-Zuhayli 1989, hlm 33.
46. Al-Qadiri 1997: 497
47. Al-Qadiri 1997: 499-500
48. Kerabat yang bukan mahram seperti sepupu dan mahram yang tidak mempunyai hubungan darah seperti saudara susuan adalah sah penarikan balik hibahnya. Inas Abbas Ibrahim, *Hibah Al-Aba' li Abna'ihim Hlm*

Al-Hayah, Majallah Al-Syariah wa Al-Dirasat Al-Islamiyyah, 1413H/
1993M, Kuwait: Majlis Al-Nasyar Al-Ilmiy Fi Jamiah Kuwait, hlm 91.

49. Al-Zuhayli 1989: 31
50. Al-Zuhayli 1989: 31
51. Muhammad Husni 1994: 104
52. Hasan 2004: 83
53. Al-Qadiri 1997, hlm 500
54. Hasan 2004, hlm 83
55. Al-Baiyhaqi 1994, hlm 181
56. Al-Darqutni t.t. hlm 3: 44
57. Hasan 2004, hlm 83.
58. Muhammad Husni 1994, hlm 100.
59. Ibn Qudamah t.t. hlm, 290
60. Al-Damiri 2004, hlm 556-557
61. Ibn Qudamah t.t hlm 252; Inas 1993, hlm 90-91
62. Inas 1993, hlm 92
63. Ibn Qudamah t.t. hlm 270
64. Ibn Qudamah t.t. hlm 271
65. Al-Zuhayli 2007 hlm 154
66. Inas 1993, hlm 91
67. Hasan 2004, hlm 80
68. Al-Damiri 2004, 154
69. Al-Sharbini t.t. hlm173
70. Al-Sharbini 1994, hlm 568
71. Hasan 2004, hlm 82
72. Al-Damiri 2004, hlm 558
73. Muhammad Husni 1994, hlm 113
74. Al-Sharbini t.t., hlm173

75. Ibn Qudamah t.t. hlm 278; Muhammad Husni 1994, hlm 114
76. Al-Zuhayli 1989, hlm 27
77. Al-Damiri 2004, hlm 561

Rujukan

Tafsir Pimpinan Ar-Rahman.

Ahmad bin al-Husin Al-Bayhaqi (1414H/1994M). *Sunan al-Bayhaqi al-Kubra*, Mekkah: Maktabah Dar al-Baz.

Ali bin Umar Al-Darqutni. (1386H/1966M). *Sunan al-Darqutni*. Beyrut: Dar al-Ma'rifah.

Al-Kasani, 'Ala' al-Din Abi Bakr bin Mas'ud. 1419H/1998M. *Badai' al-Sanai' Fi Tartib al-Syarai'*. 'et.2. Beyrut: Dar Ihya' al-Turath al-'Arabi.

Hasan Muhammad Buda. 2004. *Mawani' al-Ruju' fi al-Hibah fi al-Fiqh al-Islamiy wa al-Qanun al-Wad'i*. Iskandariyyah: Dar al-Jami'ah al-Jadidah li al-Nasyr.

Ibn Qudamah, 'Abd Allah bin Ahmad. t.th. *al-Mughni*. Juz. 6. Beyrut: Dār al-Kitāb al-'Arabi.

Ibn Rushd, Muhammad bin Ahmad. 1416H/1996M. *Bidayah al-Mujtahid wa Nihayah al-Muqtasid*. Beyrut: Dar al-Kutub al-Ilmiyyah.

Ibn Rushd, Muhammad bin Ahmad. 1416H/1996M. *Bidayah al-Mujtahid wa Nihayah al-Muqtasid*. Beyrut: Dar al-Kutub al-Ilmiyyah.

Inas Abbas Ibrahim. 1413H/1993M, *Hibah al-aba' li abnaihimi hal al-hayah. Majalah al-Shari'ah wa al-Dirasat al-Islamiyyah*. Kuwait: Majlis al-Nasyr al-'Ilmi Fi Jamia'ah al-Kuwait. Bil. 19.

Jamal al-Din Muhammad bin Mukram Ibn Manzur. (1427H/2006M). *Lisan al-'Arab*. Riyadh: Dar al-Akhyar.

Muhammad bin Ismail Al-Bukhari (1407H/1987M). *Al-Jami' al-Sahih al-Muhtasar*, 'et.3. Beyrut: Dar Ibn Kathir.

Muhammad bin Musa bin 'Isa Al-Damiri, (1425H/2004M). *al-Najm al-Wahhaj fi al-Syarh al-Minha*, t.tp.: Dar al-Minhaj. jil. 5.

Muhammad bin 'Abdulla Al-Hakim (1411H/1990M). Al-Mustadrak 'ala al-Sahihayni. Beyrut: Dar al-Kutub al-'Ilmiyyah.

- Muhammad bin Husayn bin 'Ali Al-Qadiri. (1418H/1997M). *Takmilah al-Bahr al-Raiq Syarh Kanz al-Daqaiq*. Juz.7. Beirut: Dar al-Kutub al-'Ilmiyyah.
- M. Rauwwas Qal'ah Ji et.al. 1405H/1985M. *Mu'jam Lughah al-Fuqaha'*. Beirut: Dar al-Nafais.
- Muhammad Husni Ibrahim Salim. 1994M/1415H. *Al-Hibah fi Al-Fiqh Al-Islamiy Dirasah Muqaranah*. Kaherah: Dar al-Taba'ah al-Muhammadiyah.
- Mustafa Khin et.al. 1427H/2006M. *al-Fiqh al-Manhaji ala Mazahib al-Imam al-Syafi'i*. Jil.3. Damsyiq: Dar al-Qalam.
- Al-Nawawi, Abi Zakaria Muhyiddin bin Syarf. 1415H/1995M. *Kitab al-Majmu' Syarh al-Muhazzab li al-Syirazi*. Jeddah: Maktabah al-Irsyad.
- Al-Qazwini, Muhammad bin Yazid. T.th. *Sunan Ibn Majah*. Beyrut: Dar al-Fikr.
- Al-Sharbini, Muhammad bin Muhammad al-Khatib. 1415H/1994M. *Mughni al-Muhtaj Ila Ma'rifat Ma'ani Alfaz al-Minhaj*. Juz.3. Beirut: Dar al-Kutub al-'Ilmiyyah.
- Al-Sharbini, Muhammad bin Muhammad al-Khatib. t.th. *al-Iqna' fi hal al-faz Abi Shuja'*. Beirut: Dar al-Kutub al-'Ilmiyyah. Juz.2.
- Al-Zuhayli, Wahbah. 1409H/1989M. *Al-Fiqh al-Islamiy wa Adillatuh*. 'et.3. Damsyiq: Dar al-Fikr.
- Al-Zuhayli, Wahbah. 1428H/2007M. *al-'Uqud al-musamah fi qanun al-mu'amalat al-madaniyah al-imarati wa al-qanun al-madani al-urduni*. Beirut: Dar al-Fikr.